

■ VATICAN

Msgr. Pietro Parolin – niev secretari statal

(anr) Sco niev secretari statal – il secund ella hierarchia dalla baselgia – ha papa *Francesc*g nominau il diplomat talian dil Vatican arzuestg *Pietro Parolin*. El ei cun ses 58 onns relativamein giuven, denton gia in dils pli profilai diplomats dalla sontga sedia e sa – sper il talian – era franzos, engles e spagnol.

Arzuestg *Pietro Parolin* daventa successur da cardinal *Tarcisio Bertone* e vegn probabel nominaus cardinal tier il proxim consistori. Msgr. *Pietro Parolin*, tochen dacheu nunzi papal en Venezuela ed avon viceminister digl exteriur el Vatican, surpren miez october la nova incarica alla testa dil pli ault post dalla Curia romana. Sco fetg stretg collaboratur dil papa meina el il secretariat general, ei responsabels e cumpetents per la coordinaziun ella Curia e la diplomazia vaticana.

Il niev secretari statal, msgr. *Pietro Parolin*, ei naschius 1955 a Schiavon ella provinza da Vicenza el nord dall'Italia. Suenter l'ordinaziun sacerdotala 1980 ha el pastorau in temps egl uestgiu da Vicenza. 1984 frequenta el l'Academia papala per diplomats e promova el dretg canonic. 1986 entra el en survetsch diplomatic. El ei staus sin divers posts egl exteriur sco a Nigeria ed el Mexico. 2009 vegn el distinguius cun la «Grosses Verdienstkreuz» dalla Republica federala tudestga, essend ch'el seigi s'engaschus grondamein e cun success per las relaziuns denter la Tiaratudestga ed il Vatican.

Il niev secretari statal, arzuestg *Pietro Parolin*, veva sez buca quintau cun quella nomina ed ei perquei staus fetg surs-taus. El ha denton engraziu al papa per la gronda confidanza demussada e sincerau a lez loialitad e collaboraziun cupleina.